



কিওয়ার গার্টেনের ব্যাপারে জরিপ শুরু হইয়াছে

(ইত্তেফাক রিপোর্ট)
গতকাল (বুধবার) জাতীয় সংসদে শিক্ষাসংক্রান্ত বিষয়ে আওয়ামী লীগের কামরুজ্জামানের এক সম্পূর্ণ প্রশ্নের জবাবে শিক্ষামন্ত্রী মাহবুবুর রহমান বলেন, সমাজের একটি বিশেষ শ্রেণীর জন্য ব্যাণ্ডের ছাতার মত কিওয়ার গার্টেন স্কুল (১৫শ পৃঃ দঃ)

কিওয়ার গার্টেন

(১ম পৃঃ পর)

গজাইয়া উঠিতেছে। সরকার এইসব কিওয়ার গার্টেনের পৃষ্টপোষকতা করার বিরোধী। শিক্ষামন্ত্রী বলেন, কিওয়ার গার্টেন স্কুল খোলার জন্য এতদিন কোন নিয়ম ছিল না এবং সরকারের নিকট হইতেও স্বীকৃতি নেওয়ার বিধি ছিল না। কিওয়ার গার্টেন স্কুলগুলিতে কি শিক্ষা দেওয়া হইতেছে এবং ইহার প্রয়োজনীয়তা আছে কিনা এই ব্যাপারে একটি জরিপ কাজ শুরু হইয়াছে। ভবিষ্যতে কিওয়ার গার্টেনে সরকারী পাঠ্যক্রম চালু করিতে বাধ্য করা হইবে।

সরকারী দলের সদস্য জাহাঙ্গীর মোঃ আদেলের এক প্রশ্নের জবাবে শিক্ষামন্ত্রী বলেন, ঢাকা নগরীতে কত কিওয়ার গার্টেন স্কুল আছে শিক্ষামন্ত্রণালয় এই ব্যাপারে অবহিত নয়। তদানীন্তন পাকিস্তান আমলে ১৯৬২ সালে 'রেজিষ্ট্রেশন অব প্রাইভেট স্কুল' নামে একটি অধ্যাদেশ জারি হয় তবে এই অধ্যাদেশে রেজিষ্ট্রেশনের ব্যাপারে কোন সুস্পষ্ট বিধান না থাকায় কিওয়ার গার্টেন, নার্সারী ও টিউটরিয়েল হোম স্কুলগুলির রেজিষ্ট্রেশন হয় না।

এক হাজার প্রাথমিক বিদ্যালয় সরকারীকরণের কর্মসূচী

শাহ মোহাম্মদ আবু জাফরের প্রশ্নের জবাবে শিক্ষামন্ত্রী মাহবুবুর রহমান বলেন, বর্তমানে দেশে সরকারী প্রাথমিক বিদ্যালয়ের সংখ্যা ৩৭ হাজার ২ শত ২৬টি এবং বেসরকারী স্কুলের সংখ্যা ৬ হাজার ৮ শত ৮১টি। তৃতীয় পঞ্চবার্ষিক পরিকল্পনার এক হাজার বেসরকারী প্রাথমিক বিদ্যালয় সরকারীকরণের কর্মসূচী আছে।